

Siunnersuut: Inatsisartut Ombudsmandiat pillugu Inatsisartut inatsisaat nr. xx, xx.xx.2017-imeersoq
(Inatsisartut Siulittaasoqarfiat)

Saqqummiussissut
(Inatsisartut Siulittaasuut)

Siullermeerinnineq

Inatsisartut Ombudsmandiat pillugu Inatsisartut inatsisissaattut siunnersuut Inatsisartut Siulittaasoqarfiat sinnerlugu matumuuna saqqummiuppara.

Ombudsmandip misissuinermik suliaqarnera Inatsisartut Ombudsmandiat pillugu Inatsisartut inatsisaatigut atuuttukkut erseqqissarneqarpoq, Ombudsmandillu misissuisarnini ukiut kingullit ingerlaneranni amerliartortissimavai.

Kalaallit Nunaanni Namminersorlutik Oqartussat kommunillu ataanni pisortat ingerlatsivii Ombudsmandip sulinerani pineqartunut ilaatinneqarput, taamaattumillu Ombudsmandip paaqqinniffiit/suliffeqarfiit Kalaallit Nunaanni Namminersorlutik Oqartussat kommunillu ataanniittut misissuiffigisinnaavai. Paaqqinniffiilli/suliffeqarfiilli namminersortut meeqqat eqqarsaatigalugit suliaassanik isumagisaqartut Ombudsmandip massakkut taamaallaat killilimmik toqqaannartumik nakkutigisinnaavai. Ombudsmandi inatsisissatut siunnersuutikkut matumuuna paaqqinniffinni/suliffeqarfinni namminersortunik meeqqat sumiiffigisaanni/najugaqarfigisaanni misissuinissamut pisinnaatinneqarpoq.

Ombudsmandi Ombudsmandi pillugu inatsisikkut atuuttukkut nuna tamakkerlugu pinaveersaartitsisutut arlaannaannulluunniit attuumassuteqanngitsutut sulisussatut toqqaarneqarpoq, inuillu kiffaangissusiiagaasut naalliutsinneqannginnissaat allatulluunniit peqqarniingartumik, inuppalaanngitsumik nikanarsaataasumilluunniit pineqannginnissaat pillarneqannginnissaalluunniit peqataaffigissallugu. Taamaattumik Ombudsmandi paaqqinniffinni/suliffeqarfinni Kalaallit Nunaanni Namminersorlutik Oqartussat ataanniittuni inuit kiffaangissusiiagaaffigisinnaasaanni misissuisarsimavoq.

Tigummigallaaffiit misissorneqartussat tassaaginnanngillat pisortat paaqqinniffiutaat/suliffeqarfiutaat. Ombudsmandip pisinnaatitaanera pissutsit paaqqinniffinni/suliffeqarfinni namminersortuni kiffaangissusiiagaasut atugaat ilaatilerlugit inatsisissatut siunnersuutikkut annertusiarneqarpoq. Ombudsmandi inatsisissatut siunnersuutikkut periarfissaqalerpoq eqqartuussivik aalajangiitinnngikkaluarlugu paaqqinniffinni/suliffeqarfinni namminersortuni inuit kiffaangissusiiagaaffigisimasaanni kiffaangissusiiagaaffigisinnaasaaniluunniit misissuinissaminut. Aalajangersagaq taanna inatsimmik siunissaq eqqarsaatigalugu qularnaarinissaq siunertarlugu ilanngunneqarpoq, taamaalillunilu Ombudsmandi paaqqinniffinni/suliffeqarfinni namminersortuni misissuisinnaalissaq, paaqqinniffinnik/suliffeqarfinnik namminersortunik inuit kiffaangissusiiagaaffigisinnaasaannik siunissami pilersitsisoqarpat.

Allanguutit taakku inatsisip allanguutissaatut siunnersuutikkut saqqummiunneqanngillat, Inatsisartulli Ombudsmandiat pillugu Inatsisartut inatsisaattut tamarmiusutut nutaatut

siunnersuutikkut saqqummiunneqarlutik. Inatsisip tamarmiusup pisariitsup paasiuminartullu pigineqarnissaanik kissaateqarnermik tamanna pissuteqarpoq.

Inatsit pillugu oqaaseqaatit itisilerisumik allaaserinnittut innersuussutigalugit siunnersuut Inatsisartuni akuersaartumik oqaluuserisassanngortippara.